

sed ab altero palam exigit poenam. Evidem ut sentio, viri Athenienses, ex multis quae quis afferre potest pro Ctesiphonte hoc ante omnia iure expostulet: quid tibi cum isto, Aeschines? cur non ipsi inter nos inimicitarum iura persequimur? Nam cum inimico pugnare nolle, sed pro illo alium quaerere quem laedas, summa perversitas est. Ex quo satis signi est, viri Athenienses, cetera quoque, | quae obiecta sunt, nec iure nec vere fuisse obiecta. Sed executiam *Fol. 5 r.* singula et potissimum quae de pace et legatione calumniatur, crimina sua in me refundens, quae ipse una cum Philocrate commisit. Operae pretium tamen est, viri Athenienses, quonam modo res ea tempestate se haberent, in memoriam vobis redigere, ut omnia ex ipsa temporum condicione consideretis.

Bello quod inter Phocenses atque Thebanos ortum est, neque id mea opera, quippe qui nondum ad rem publicam accessissem, primum vos ea mente eratis, ut pro Phocensium quidem salute vota faceretis, Thebanis autem quamlibet cladem imprecaremini, non ab re nec praeter rationem illis infensi, quod videlicet Victoria in Leuctris parta intemperanter abuterentur. Deinde Peloponnesus omnis seditionibus intestinis laborabat, tum nec ii, qui infesto in Lacedaemonios animo erant, ad opprimendos eos vires habebant, nec qui prius illorum studiis optimates in civitatibus suis fuerant, tunc principatum optinebant, sed et hi ipsi et reliqui Graeciae populi impliciti simultatibus, odiis, factionibus erant. Quae quidem Philippus intelligens — neque enim erant obscura — per suos quamque civitatem proditores pecunia sollicitabat et causas passim discordiarum ferebat³⁾), ipsos inter se committens. Atque ita quibus ex rebus illi male sibi consulebant, ex iis ipse instruebatur contra omnes proficiebatque. Ut vero Thebanis diuturno bello affectis, tunc tumidis nunc abiectis, constabat opem nostram necessario imploratum iri, hoc ipsum metuens Philippus, ne scilicet hae civitates societatem | inirent, nobis *Fol. 5 v.* quidem pacem, Thebanis vero subsidium spondet. Quae igitur illi res affuit, ut vos prope dixerim scientes prudentesque deceperit? Profecto ceterorum Graecorum sive malitiam⁴⁾ sive utrumque dicere oportet, qui vos difficili longoque occupatos bello eoque pro

³⁾ serebat?

⁴⁾ In der Handschrift keine Lücke, doch fehlt augenscheinlich *sive inscitiam* oder *ignorantiam*.